



« 16 » 07

2026 թ.

N 24/26-Լ

Հ Ր Ա Մ Ա Ն

ՍՈՑԻԱԼԱԿԱՆ ԱՊԱՀՈՎՈՒԹՅԱՆ ԾԱՌԱՅՈՒԹՅԱՆ ՊԵՏԻ 2012 ԹՎԱԿԱՆԻ ԱՊՐԻԼԻ 11-Ի N 38-Լ ՀՐԱՄԱՆՈՒՄ ԼՐԱՑՈՒՄՆԵՐ ԿԱՏԱՐԵԼՈՒ ՄԱՍԻՆ

Ղեկավարվելով Հայաստանի Հանրապետության աշխատանքային օրենսգրքի 207.1-ին հոդվածով, 218-րդ հոդվածի 2-րդ մասով, «Նորմատիվ իրավական ակտերի մասին» օրենքի 33-րդ և 34-րդ հոդվածներով.

ՀՐԱՄԱՅՈՒՄ ԵՄ՝

1. Սոցիալական ապահովության ծառայության պետի 2012 թվականի ապրիլի 11-ի «Հայաստանի Հանրապետության աշխատանքի և սոցիալական հարցերի նախարարության սոցիալական ապահովության ծառայության աշխատակազմի աշխատանքային կարգապահական ներքին կանոնները հաստատելու և Հայաստանի Հանրապետության աշխատանքի և սոցիալական հարցերի նախարարության սոցիալական ապահովության ծառայության պետի 2008 թվականի դեկտեմբերի 10-ի N 175 հրամանն ուժը կորցրած ճանաչելու մասին» N 38-Լ հրամանի (այսուհետ նաև՝ Հրաման) հավելվածը լրացնել նոր՝ 13-րդ գլխով, հետևյալ բովանդակությամբ.

«XIII. ԾՆՈՂԱԿԱՆ ԺԱՄԻ ՏՐԱՄԱԴՐՈՒՄԸ ԾԱՌԱՅՈՒԹՅՈՒՆՈՒՄ»

156. Ծնողական ժամը ինքնուրույն և առանձին երաշխիք է և կարող է օգտագործվել ՀՀ աշխատանքային օրենսգրքի և (կամ) սույն կանոններով սահմանված այլ երաշխիքների հետ միասին:

157. Ծնողական ժամը ներառվում է աշխատողի աշխատաժամանակի մեջ:

158. Ծնողական ժամը ներառվում է աշխատաժամանակում, և այդ ժամանակահատվածում պահպանվում է աշխատողի հիմնական աշխատավարձը

(գործավարձով վարձատրվող աշխատողների դեպքում՝ միջին աշխատավարձ, բացառությամբ պարգևատրման գումարների):

159. Ծնողական ժամից օգտվելու իրավունք ունի Ծառայության աշխատող ծնողը (այդ թվում՝ խնամատար ծնողը, որդեգրողը կամ խնամակալը), ով՝

- 1) ունի մինչև տասներկու տարեկան մեկ կամ երկու երեխա,
- 2) ունի մինչև տասներկու տարեկան երեք և ավելի երեխա,
- 3) ունի մինչև տասնութ տարեկան՝ ֆունկցիոնալության ծանր կամ խորը սահմանափակում ունեցող երեխա (անկախ երեխաների ընդհանուր թվից):

160. Ծնողական ժամից կարող են օգտվել Ծառայության աշխատող երկու ծնողը (այդ թվում՝ խնամատար ծնողը, որդեգրողը կամ խնամակալը) հավասարապես:

161. Ծնողական ժամը տրամադրվում է՝

- 1) մինչև տասներկու տարեկան մինչև երկու երեխա ունեցող ծնողին (խնամատար ծնողին կամ որդեգրողին կամ խնամակալին)՝ իր ցանկությամբ՝ օրական առավելագույնը 30 րոպե,
- 2) մինչև տասներկու տարեկան երեք և ավելի երեխա ունեցող ծնողին (խնամատար ծնողին կամ որդեգրողին կամ խնամակալին)՝ իր ցանկությամբ՝ օրական առավելագույնը մեկ ժամ,
- 3) մինչև 18 տարեկան՝ ֆունկցիոնալության ծանր կամ խորը սահմանափակումով երեխա ունեցող ծնողին (խնամատար ծնողին կամ որդեգրողին կամ խնամակալին)՝ իր ցանկությամբ՝ օրական առավելագույնը մեկ ժամ (անկախ երեխաների թվից):

162. Ծնողական ժամից օգտվելու համար աշխատողը Ծառայության Գլխավոր քարտուղարին է ներկայացնում գրավոր դիմում (Ձև N 5.1), որին կցվում է երեխայի ծննդյան վկայականը (վկայականները), իսկ խնամակալության, ինչպես նաև ֆունկցիոնալության սահմանափակում ունեցող երեխայի դեպքում՝ համապատասխան փաստաթղթերը ուղարկվում են Ծառայության մարդկային ռեսուրսների կառավարման վարչության hr@socservice.am էլեկտրոնային փոստի հասցեին:

163. Դիմումը բավարարվում է, հիմք ընդունելով սույն գլխի 161-րդ կետում սահմանված առավելագույն տևողությունը, եթե աշխատողը միաժամանակ բավարարում է մեկից ավելի ենթակետերի պահանջներին:

164. Դիմումը կարող է մերժվել միայն այն դեպքում, երբ Ծառայության աշխատող ծնողը (խնամատար ծնողը, որդեգրողը կամ խնամակալը) չունի ծնողական ժամից օգտվելու իրավունք:

165. Ծնողական ժամի իրավունքը կարող է դադարեցվել, եթե ի հայտ են եկել ծնողական ժամից օգտվելը բացառող հանգամանքներ:

166. Ծնողական ժամի իրավունքի դադարեցման հիմքեր առաջանալու դեպքում՝ աշխատողը պարտավոր է եռօրյա ժամկետում գրավոր տեղեկացնել Ծառայության գլխավոր քարտուղարին:

167. Ծնողական ժամի իրավունք ունեցող Ծառայության աշխատողն իր բացակայության տևողությունը և բացակայության ժամերը նախապես համաձայնեցնում է անմիջական ղեկավարի, իսկ մասնագիտական կառուցվածքային ստորաբաժանման ղեկավարի դեպքում՝ Ծառայության պետի ոլորտային տեղակալի հետ:

168. Ծնողական ժամը կարող է օգտագործվել ամբողջությամբ՝ առավելագույն տևողությամբ կամ մասնատված՝ աշխատանքային օրվա ընթացքում:»:

2. Հաստատել ծնողական ժամից օգտվելու համար դիմումի ձևը (Ձև N 5.1)՝ համաձայն սույն հրամանի հավելվածի:

3. Սույն հրամանն ուժի մեջ է մտնում հրապարակմանը հաջորդող օրվանից:

4. Միասնական սոցիալական ծառայության քարտուղարության պետին՝ ապահովել սույն հրամանի հրապարակումը:

ԾԱՌԱՅՈՒԹՅԱՆ ՊԵՏ՝

Ա. ԱՂԱԲԱԲՅԱՆ





«Հավելված»
Միասնական սոցիալական ծառայության պետի
2026 թվականի հուլիսի 16-ի N 24/26-Լ հրամանով
հաստատված Ձև N 5.1

ԴԻՄՈՒՄ ԾՆՈՂԱԿԱՆ ԺԱՄԻՅ ՕԳՏՎԵԼՈՒ ՀԱՄԱՐ

Միասնական սոցիալական ծառայության գլխավոր քարտուղարին

Աշխատող _____-ից

(պաշտոն, անուն, ազգանուն)

Խնդրում եմ ինձ տրամադրել ծնողական ժամից օգտվելու հնարավորություն:

Տեղեկացված եմ, որ աշխատանքային օրվա ընթացքում բացակայության տևողության և ժամանակահատվածի (օրվա սկիզբ, ավարտ կամ միջանկյալ) մասին՝ ելնելով երեխայի կարիքներից, պարտավոր եմ նախապես տեղեկացնել անմիջական ղեկավարին:

Կցվող փաստաթղթեր՝

1. երեխայի ծննդյան վկայականը (վկայականները),

2. ☐ խնամակալության վերաբերյալ փաստաթուղթը կամ ֆունկցիոնալության սահմանափակման վերաբերյալ փաստաթուղթը ուղարկվել է Ծառայության մարդկային ռեսուրսների կառավարման վարչության էլեկտրոնային փոստի հասցեին:

Ստորագրություն՝ _____ Անուն Ազգանուն՝ _____

Ամսաթիվ՝ _____թ.